

Jahresbericht vom Tanze 2008

46 Mau si d'Tanzlüt im 2008 zämecho. 36 Mau hei si probet u 8 Mau si sy öffentlech ufträtte.

Scho am 4. Januar si ds Vreni Wiedmer, d'Brigitta Grünig, ds Vreni Bühlmann u d'Silvia Bühlmann, a ds erschte vo vierne Tanzleitertanze i ds Schueuhuus Steinebrünne gfare. Dert si sy wieder flissig ga nöii Tänz lehre.

Am Wochenänd vom 19. u 20. Januar si ä grossi Anzahu Tanzfroue, nämlech 8, i ds Gwatt ga schnuppere u lehre, was i dr Voukstanzwäut Nöis isch usecho. Natürlech si d'Tänzerinne du o gspannt gsi, wie das im Singe so zu u här geit, u us däm Grund hei sy ou dert äs Bsüechli gmacht.

Am 14. März si d'Elisabeth Fankhauser u ds Vreni Brönnimann i Eywald, im Rüscheeggerländli, gah d'DV vor Trachtevereinigung Landesteil Mittelland bsueche, für di nöischte Informatione z'vernäh.

Im Frühlig si während zwöine Mau äs paari vor Tanzgruppe a ds „Tanze für aui.“ Das isch vor Tanzleitig Mittelland düregfuehrt worde.

Am 11. März het Trachtegruppe Gurzele zum Regionauträffe iglade. Nach 6-jährigem Ungerbruch si mir Gurzeler wieder ar Reihe gsi, dä Anlass düre z'fuehre. Im wunderschön gschmückte Dorfsaal hei sech am Abe über hundert Tänzerinne u Tänzer zum Tanze u Singe troffe. D'Ländlerkapäue Ulmizbärg het di igstudierte Tänz mit lüpfiger u rassiger Musig ungerstützt. Ds Chörli het mit schöne Jodulieder dr Abe verschöneret. Ds Vreni Wiedmer het locker u souverän dür ds Programm gfuehrt. Di säuber gmachte Tüblisandwiches u di verschiedene Turte si bi de hungrige Tanzlüt gschetzt worde. Dä gmüetlech Abe wird üs aune no lang i beschter Erinnerung blibe. Ä ganz häzleche Dank a aui Häuferinne u Häufer, wo zum Glinge vo däm Abe hei bitrage.

Am 4. Mai hei d'Elisabeth Fankhauser, ds Vreni Brönnimann, d'Brigitta Grünig, ds Vreni Wiedmer u d'Silvia Bühlmann am Bott vo dr Bärnische Trachtevereinigung ir Mehrzweckhalle Bach z'Uetendorf teilgno. Näbscht de üebleche Traktande si dieses Jahr keini heisse Theme z'behandle gsi. Di erschte Informatione über ds Eidgenössische Trachtefescht 2010 si ganz interessant gsi. Dankem wunderschöne Wätter het me nachem Mittagässe ufem Rase chönne tanze.

Am feschtliche Tanzabe am 24. Mai im Casino z'Bärn hei ds Vreni Widmer u d'Brigitta Grünig teilgno.

Dr Höhepunkt vom diesjährige Jahr isch am 14. u 15. Juni sicher ds Schwyzerische Volkstanzfescht, verbunge mit dr Delgierteversammlung, z'Hersou gsi. Am früeche Morge vom 14. Juni si mir 9 Froue vo dr Tanzgruppe mitem Zug Richtig Herisou gfare. Scho z'Bärn si mir mit erschte Schwierigkeite konfrontiert worde. Dr reserviert aber abgeschlossnig Bahnwage het wäge fehlendem Schlüssel nid chönne brucht wärde. Nach zwöi stündiger Zugfahrt si mir z'Niederuzwil ga ds Gepäck deponiere u aschliessend mitem Bus ä ds Tanzfescht uf Herisou gfare. Es schön gschmückts Dorf het üs Trachtelüt hätzlech empfangen. Nachedem feine Mittagässe im Altersheim ☺ isch Delgierteversammlung ufem Programm gstange. Ds aschliessende Apéro vorem grosse Feschtzäut isch buechstäblech i ds Wasser gfaue. Ä heftige Platschräge het üs wider i ds Altersheim vertriebe. Vorem Nachtässe hei mir no Gläheheit gha, verschieden Tanzvorführige z'gniesse. Leider hei mir am Abe die guete Plätz im überfüllte Feschtzäut verpasst. Z'hingerscht im Feschtzäut hei mir dr ganz Abe müesse friere. Trotdäm hei mir das schöne Abeprogramm chönne gniesse. Nach dr kurze Nacht u emene guete Zmorge hei mir am Sunntig dr idrücklech Feschtumzug bsuecht. Mit dr Heifahrt isch äs erlänireichs Trachtefescht z'End gange.

Ds Tanzleiterträfle hei ds Vreni Wiedmer, d'Brigitta Grünig, ds Vreni Bühlmann u d'Silvia Bühlmann am 28. Oktober z'Gümlige bsuecht. Mir schetzes sehr, dass sie geng di Zyt näh, für nöii Tänz ga z'lehre. Für das danke mir ihne viu mau.

Am 5. November het üses Ehremitglied, d'Lydia Fahrni, dr 70ischt Geburtstag dörfe fiire. D'Tanzgruppe isch am Sunntig 9. November zum Apéro ir Pfründeschüür z'Thierachere iiglade gsi. Bi feinem Ässe, Trinke, Tanze, Jodugsang u Musig hei mir zwöi gmüetlechi Stunge mit dr Jubilarin u ihrer Familie dörfe verbringe. Mir wünsche ar Lydia o hie no aues Guete, geng gueti Gsundheit u hoffe natürlech, dass si no lang i üser Tanzgruppe mitmacht.

Silvia Bühlmann